



## Sumáriu:

### Atividade Parlamentu Nasionál fulan Agostu 2020

#### Introdusaun

JSMP monitoriza diaramente atividade Parlamentu Nasionál nian. Atividade prinsipál sira Parlamentu Nasionál nian mak reuniaun plenária no Komisaun Especializada Permanente sira-nian no fiskalizasaun ba programa no atividade Governu nian.

Reuniaun plenaria hala'o iha Segunda-feira no Tersa-feira, reuniaun Komisaun sira-nian hala'o iha Kuarta-feira no Kinta-feira no fiskalizasaun hala'o iha Sesta-feira. Reuniaun plenária, aleinde plenária normál, iha mós plenária extraordinária. Reuniaun plenária extraordinária hala'o ses husi oráriu reuniaun plenaria normál nian.

Iha período fulan Agostu, Parlamentu Nasionál sei iha período resesaun, nune'e Parlamentu Nasionál funsiona de'it ho Komisaun Permanente. Komisaun ne'e kompostu husi deputadu sira ne'ebé nomea husi bankada parlamentár sira mak hanesan Bankada Fretilin, CNRT, PLP, KHUNTO, PD, FM+UDT no PUDD ho total membru hamutuk 27.

Reuniaun Komisaun Permanente ne'e nian depende ba asuntu no la funsiona regulár. Mezmuke nune'e, Komisaun Especializada Permanente sira balun hala'o sira-nia atividade iha tempu resesu hanesan Komisaun C. Nune'e, iha sumáriu ida ne'e, JSMP sei deskreve de'it atividade Komisaun Permanente no Komisaun C nian.

#### Atividade Komisaun Permanente

Komisaun Permanente ne'e funsiona iha período ne'ebé Parlamentu Nasionál iha situaun disolidu, iha sesaun intervallu ka resesu Parlamentu nian no iha situaun ka kazu sira seluk ne'ebé prevee iha Konstituisaun hanesan prevee iha provizaun pontu 2) Artigu 102 Konstituisaun RDTL (K-RDTL). Komisaun ne'e iha kompeténsia própria hanesan prevee iha provizaun pontu 3) Artigu 102 K-RDTL.

Tuir obersaun JSMP nian, atividade Komisaun Permanente iha tinan ida ne'e nian la'o ho di'ak, efektivu no produtivu tebes kompara ho tinan sira uluk nian, mezmuke iha reuniaun

plenária balun deputadu sira husi bankada opozisaun balun la partisipa. JSMP mós observa katak Komisaun ne'e la hasoru problema no dezafiu iha hala'o nia knaar durante fulan Agostu nia laran.

Reunian plenaria Komisaun Permanente hanesan tuir mai ne'e:

1) Reuniaun plenaria iha 05 Agostu 2020

- a. Komisaun Permanente hili membru meza mak hanesan Sekretária Meza no Vise-Sekretáriu Meza.
- b. Komisaun Permanente halo diskusaun ba projetu deliberasaun nú.6/V (2<sup>a</sup>) – kona-ba konvokasaun Parlamentu Nasionál ba pedidu autorizasaun Estadu Emerjénsia (EE) ba dahaat.

Iha diskusaun ne'e, Komisaun Permanente autoriza Prezidente Repúblika dekreta EE liuhusi Rezolusaun Parlamentu Nasionál Nú.58/2020 kona-ba autoriza Prezidente Repúblika atu dekreta EE durante loron 30, hahu oras 00:00 iha loron 6 Agostu to'o oras 23:59 fulan Setembru. Rezolusaun refere aprova ho votu sira a favor 20, kontra 0 no abstensaun 0.

Iha observasaun JSMP nian nota katak diskusaun ba projetu deliberasaun ba pedidu autorizasaun EE ne'e bankada opozisaun sira auzente hotu.

- c. Iha momentu hanesan Komisaun Permanente mós aprova deliberasaun ida hodi realiza sesaun plenária extraordinária iha 11 Agostu 2020 hodi halo votu sira konfirmasaun ba rezolusaun ne'ebé Komisaun Permanente aprova ona.

2) Reuniaun plenaria iha 11 Agostu 2020

Liuhusi sesaun plenária extraordinária, Parlamentu Nasionál halo votu konfirmasaun ba deklarasaun EE husi Prezidente Repúblika ho autorizasaun Komisaun Permanente antes ne'e.

Tuir observasaun JSMP nian, iha deklarasaun votu konfirmasaun ne'e, maioria bankada sira Governu nian fó sira-nia apoiu másimu ba deklarasaun EE ba dahaat inklui opozisaun UDT/FM, maibé CNRT mak vota abstensaun. Bankada CNRT justifika katak la'os lakohi fó apoiu tomak ba aprovasaun sira ne'e maibé husu atu Prezidente Repúblika promulga de'it Lei ba Protesaun Sivil.

Maski bankada sira fó apoiu tomak ba deklarasaun EE, maibé kontinua fó hanoin ba Governu atu investiga didi'ak ema sira ne'ebé tama mai husi estranjeiru, liuliu ba traballadór hirak ne'ebé foin lalais ne'e mai husi Korea Súl no nasaun seluk.

3) Reuniaun plenaria iha 19 Agostu 2020

Rua Beco Lakateu, Aldeia Manu fuik,  
Suku Colmera, Administrativu Vera Cruz  
Dili Timor Leste  
PoBox: 275  
Telefone: 3323883 | 77040735  
[www.jsmp.tl](http://www.jsmp.tl)  
[luis@jsmp.minihub.org](mailto:luis@jsmp.minihub.org)  
Facebook: [www.facebook.com/timorleste.jsmp](https://www.facebook.com/timorleste.jsmp)  
Twitter: @JSMPtl

Komisaun Permanente realiza tan reuniaun plenária ordinária. Iha reuniaun ne'e deputadu sira hato'o preokupasaun kona-ba nesiedade bázika povu nian.

Nesiedade bazika sira ne'ebé deputadu sira levanta mak hanesan; asesu ba bee moos, eletrisidade, edukasaun, subsídiu ba idozu ka ferik-katuas no ekipa *frontline* ba Covid-19 inklui naran ba ponte foun Laleia nian.

#### 4) Atividade seluk

- Iha 06 Agostu 2020, Komisaun Permanente halo tomada pose ba Adjuntu Provedór ba Asuntu Boa-Governasaun. Iha tomada pose ne'e, Diretora Ezekutiva JSMP mós hola parte iha seremónia ne'e tanba JSMP mós sai nu'udar panelista ida iha prosesu selesaun no rekrutamentu ba Adjuntu Provedór ne'e.
- Prezidente Parlamentu Nasionál partisipa iha reuniaun Konsellu Estadu nian iha 31 Agostu 2020. Reuniaun Konsellu Estadu ne'e taka ba públiku hanesan prevee iha provizaun pontu 2) Artigu 91 Konstituisaun RDTL, nune'e JSMP labele hetan informasaun kona-ba agenda no konteúdu reuniaun ne'e.

### **Atividade Komisaun C**

Komisaun C nu'udar Komisaun Espesializada Permanente Parlamentu Nasionál ne'ebé trata mós kona-ba asuntu sira relasiona ho finansa pública. Nune'e, iha períodu resesu parlamentár ne'e, komisaun ne'e realiza semináriu ida kona-ba kontrolu parlamentár ba finansa pública nian hahú husi 04 – 06 Agostu 2020.

Objetivu husi semináriu ne'e mak atu informa ba públiku kona-ba oinsa Parlamentu Nasionál, partikularmente Komisaun C nia knaar ka papél hodi kontrola finansa pública Estadu nian atu Governu bele jere no administra ho di'ak no apropriadu osan Estadu no povu nian.

### **Konkluzau no rekomendasaun**

Komisaun Permanente Parlamentu Nasionál iha períodu resesu tinan ida ne'e hala'o nia knaar ho di'ak no efetivu no ida ne'e sinál ida ne'ebé di'ak tebes. Nune'e mós Komisaun Espesializada Permanente sira, liuliu Komisaun C ne'ebé bele hala'o atividade iha tempu resesu.

Tanba ne'e, JSMP rekomenda atu Parlamentu Nasionál iha tinan sira tuir mai bele kontinua nafatin prátika di'ak sira hanesan ne'e, partikularmente ba Komisaun Permanente no Komisaun Espesializada Permanente sira iha tempu resesu.

Rua Beco Lakateu, Aldeia Manu fuik,  
Suku Colmera, Administrativu Vera Cruz  
Dili Timor Leste  
PoBox: 275  
Telefone: 3323883 | 77040735

[www.jsmp.tl](http://www.jsmp.tl)

[luis@jsmp.minihub.org](mailto:luis@jsmp.minihub.org)

Facebook: [www.facebook.com/timorleste.jsmp](https://www.facebook.com/timorleste.jsmp)

Twitter: @JSMPtl